

M005: Aegidius, Trierer

0,1 –[...] tet iz ze sêre
0,2 under –[...]
0,3 sîne werc wâren gote liep
0,4 diu erde die die liute
0,5 dô besezzen hæten
0,6 die an den stein ruorte
0,7 diu was leider starke
0,8 verworht mit ire sünden
0,9 daz sie manige stunte
0,10 nehein wîs wuocher ne truoc
0,11 daz klageten sie dicke unde genuoc
0,12 deme hêrren in deme steine
0,13 unze her dâ was eine
0,14 gernte des sînen trôstes
0,15 daz her sie von den ungenâden lôste
0,16 mit sîneme heiligen gebete .
0,17 der arbeit genôz her an gote
0,18 umbe dise namelîchen dinc .
0,20 daz her des lôn niuwet ne entvienc .
0,21 êr danne der heilige man
0,22 sente Aegidius dar quam
0,23 unde her des wart vermæret
0,24 daz in got geêret
0,25 alsô dicke hæte
0,26 dô bâten in die liute
0,27 daz her sîne genâde tæte
0,28 unde mînen trehtîn bæte
0,29 daz in buoz würde
0,30 der michelen dürfte
0,31 die sie in deme lande habeten
0,32 die nôt sie sêre klageten
0,33 sanctus Aegidius warp genôte
0,34 daz her umbe got erbæte .
0,35 daz her die liute gewerte .
0,36 des sie zuo ime gerten .
0,37 inniclich was daz gebet sîn .
0,38 dô erhôrte in mîn trehtîn .
0,39 der erden gap her ire kraft .

0,40 daz sie wart berehaft .
0,41 von wuochere vrühtic .
0,42 unde harte kreftic .
0,43 des lobete man unde wîp .
0,44 iemer al iren lîp .
0,45 den gotes boten edelen .
0,46 den gast des einsidelen .
0,47 dô sanctus Aegidius der guote .
0,48 gehalf den lantliuten .
0,49 daz in di genâde geschach .
0,50 vaste her des jach .
0,51 daz iz sîn wirt guote .
0,52 al mit ime tæte .
0,53 wande her was ein gotes trût .
0,54 iedoch ne wolte iz daz liut .
0,55 niemanne bekennen .
0,56 wen dem einen manne .
0,57 der dâ was enelende .
0,58 sie hæten in dem lande .
0,59 den unkreftigesten man .
0,60 der ie mohte werden .
0,61 der dô ze wære .
0,62 in manigen jâren .
0,63 neweder az noch ne tranc .
0,64 wen daz her töuwende lac .
0,65 rehte alse der man .
0,66 der iezuo sal verscheiden .
0,67 mit nihte her sich ne labete .
0,68 daz her den âtem habete .
0,69 daz was gotes wunder .
0,70 man vuorte in in der stunte .
0,71 wîtene hine unde here .
0,72 dâ man in gerne wolte generen .
0,73 sô deme nôthaften man .
0,74 nehein genâde ne bequam .
0,75 nehein senfte ane ne schein .
0,76 die liute wurden des in ein .
0,77 daz man in ûf hüebe .
0,78 unde vüre sente Aegidien trüege .
0,79 si sprâchen âne zwîvel .
0,80 her gehülfe ime des lîbes .
0,81 her wære sô durchnehtic .
0,82 her getæte in wole kreftic .
0,83 dô getrûweten die liute .
0,84 genâden deme gotes trûte .
0,85 sie vuorten den siechen man .
0,86 hine zuo der zellen .
0,87 sie vunt in deme steine .

0,88 sente Egidien aleinen .
0,89 der andere gotes holde .
0,90 was in den walde .
0,91 unde worhte sîne lîpnare .
0,92 dâ her sich mite solte neren .
0,93 den hêrren sie dô bâten .
0,94 den sie dâ vunden hâten .
0,95 daz her den siechen geheilen solte
0,96 sente Aegidius sprach her ne wolte
0,97 in mit nihte bestân .
0,98 êr danne der heilige man .
0,99 dar wider quæme
0,100 des die zelle wære .
0,101 daz ne tete her aber umbe anders niet
0,102 wen daz ime wære sô liep .
0,103 daz jener guote hêrre
0,104 dâ mit ime wære
0,105 unde sie iz beide sament tæten .
0,106 daz in des die liute
0,107 einen niht ne lobeten
0,108 dô her iz widerredete
0,109 daz her iz getuon ne wolte
0,110 vüre den gotes holden
0,111 sie den siechen legeten nider
0,112 sie sprâchen daz sie hine wider .
0,113 ne wolten niemer mêre .
0,114 den siechen gevüeren
0,115 her ne tæte in al gesunden
0,116 sie verwizzen deme gotes holden .
0,117 sîne guottæte
0,118 die her gevrümet hæte
0,119 sint daz her dar zuo in quam
0,120 dô sprâchen wîp unde man
0,121 iz wære harte wunderlich
0,122 daz her iht unnôtlich
0,123 undürftinges tæte
0,124 des her genuoc hæte
0,125 her mohte in alse wole ernerren
0,126 alse her die erden hieze beren
0,127 die dâ lange durre was
0,128 dô der hêrre gesach
0,129 daz sie in es niene erliezen
0,130 die trehene dô vile heize .
0,131 vielen deme gotes boten
0,132 sân zuo der selben stete .
0,133 hiez her den siechen ûf stân .
0,134 unde harte wole gesunt gân .
0,135 her lôste in von manigen noeten .

0,136 des genâdeten ime die liute .
0,137 beide wîp unde man .
0,138 dô schieden sie vroelîche danne .
0,139 dâ schein der gûete wuocher .
0,140 der sich dort ze Kriechen .
0,141 sô vruo bewurzelete .
0,142 her legete dem fullemunt stæte .
0,143 aller guoter dinge .
0,144 durchgozzen mit wârer minne .
0,145 dâr ûf her zimberete .
0,146 daz êwige heimôte .
0,147 dô got durch den guoten man .
0,148 die zeichen hæte getân .
0,149 dô wiste her wole ze wâre .
0,150 daz iz vile mære .
0,151 in deme lande würde .
0,152 des hæte er grôze sorge .
0,153 daz her es lop gewünne .
0,154 daz gedâhte her ime ze sünden .
0,155 wande er wole gehügete .
0,156 daz man von den buochen sagete .
0,157 daz man die guottæte .
0,158 des ruomes solte behüeten .
0,159 daz ouch nehein man .
0,160 die zwei lôn ne mac hân .
0,161 daz in die werlt lobe .
0,162 unde her doch gotes hulde behabe .
0,163 die rede ist underscheiden .
0,164 iz geschihet dicke beide .
0,165 daz man den gotes schalc lobet .
0,166 unde her doch gotes hulde behabet .
0,167 der ne ist aber ze wâre .
0,168 des ruomes niht gîre .
0,169 ouch hât manic den unsin .
0,170 daz her tuot gotelîche dinc .
0,171 mêr durch den werltlîchen ruom .
0,172 danne durch den êwigen lôn .
0,173 der verliuset michel arbeit .
0,174 daz was deme gotes boten leit .
0,175 her vorhte daz her solte .
0,176 des ruomes entgelten .
0,177 daz her sich versûmete .
0,178 den stein her alsô rûmete .
0,179 daz her nehein urloup ne nam .
0,180 stille her dannen quam .
0,181 dô vuor her an eine stat .
0,182 dâ her vile wole gesach .
0,183 daz dâ niuwet ne was .

0,184 wen loup unde gras .
0,185 unde einoete unde nieman mêre .
0,186 unde vogeles unde tiere .
0,187 ze unkünde her daz ne habete .
0,188 weliches lîbes her lebete .
0,189 dâ bevalch her sich gote in himele .
0,190 dô jener einsidele .
0,191 hine wider in die zelle quam .
0,192 unde her den hêrren niene vernam .
0,193 dô wart her es unvrô .
0,194 sêre klagete her dô .
0,195 her gewan es trûrigen muot .
0,196 her sprach “hêrre himelkûninc guot
0,197 daz ich den hêrren guoten .
0,198 den gast den ich hie hæte
0,199 mit mir niene muoste hân .
0,200 daz wil ich nû gote klagen .
0,201 als ich vile wole muoz”
0,202 dô suohte her den gotes vuoz .
0,203 mit bitteren trehenen .
0,204 bevalh her den hêrren
0,205 dô an der stunte .
0,206 deme himelischen kinde .
0,207 sanctus Aegidius der gotes schalc
0,208 streich verre in einen walt
0,209 her vlôch die werltwünne
0,210 verre in eine wüestenunge .
0,211 in ein michel einoete .
0,212 daz her dâ inne bûwete
0,213 unde her vile wole gesach .
0,214 daz iz dâ sô getân was
0,215 daz dâr die liute
0,216 nehein gewerbe ne hæten
0,217 liep wart ime die stat
0,218 deme hêrren dô got gap .
0,219 daz her dâ wart innen
0,220 einer wênigen wünnen .
0,221 eines lützelzen gebirges .
0,222 dâ vant her in der erden
0,223 ein hol alsô michel
0,224 daz her stên unde sitzen
0,225 dâr inne wole mohte .
0,226 dô lobete her mînen trehtîn
0,227 der genædigen dinge
0,228 ein schoene ursprunge .
0,229 her vore deme hole hæte
0,230 der hêrre wart dâ stæte
0,231 dô der heilige man

0,232 die wênigen herberge dô gewan .
0,233 dô wart her es harte vrô
0,234 sînen trehtîn lobete her dô
0,235 alsô saget uns daz lesen .
0,236 iz mac ouch wole wâr wesen
0,237 ob her dâ vunden hæte .
0,238 eine pfalenzen alsô guote
0,239 daz sie eineme künige wole gezæme
0,240 daz her ire iht sô vrô wære
0,241 sô her der wênigen herbergen was .
0,242 daz her decheine wîle genas
0,243 daz was gotes wunder
0,244 daz in dâ der hunger
0,245 zuo deme tôde niene brâhte
0,246 daz rôhe krût her suochte
0,247 swâ her iz in den walde vant .
0,248 daz az her des tages zuo einer stunt .
0,249 dâr zuo tranc her daz wazzer .
0,250 sîn spîse ne was niht bezzer .
0,251 daz was ein starc lîpnare
0,252 her ne hæte ire bezzere gere .
0,253 die manicvalten arbeit .
0,254 der hêrre dâ durch got leit .
0,255 in venjen unde in vasten .
0,256 in vroste unde in wache
0,257 anders in manigen noeten
0,258 dâ mite her sich kestigete .
0,259 beide naht unde tac .
0,260 her an sîneme gebete lac .
0,261 unde wegete sîner sêlen
0,262 wie dicke her vile sêre
0,263 weinende klagete
0,264 die sünde die her habete .
0,265 wider gotes hulden getân .
0,266 ouch tete der guote man .
0,267 sîn gebet vüre die kristenheit
0,268 neheinen tac her daz ne vermeit .
0,269 her ne gerete in genâden
0,270 die dô in noeten wâren .
0,271 beide lebenden unde tôten
0,272 in dem einoete .
0,273 verdienete der gotes holde .
0,274 sînes schepfæres hulde
0,275 sanctus Aegidius der guote .
0,276 leit manige noete .
0,277 durch den gotes willen .
0,278 in der tougenen zellen .
0,279 die her in den walde hæte .

0,280 dâ wonete der hêrre guote .
0,281 manic jâr unde tac
0,282 sô her nie niht ne gesach .
0,283 lebentinges mêre .
0,284 wene vogeles unde tiere
0,285 unde sôgetân gewürme
0,286 sô in dem lande swermet .
0,287 daz was ein lützel wünne
0,288 daz weter noch die sunne .
0,289 ne mohte in niht beschînen
0,290 eines starken lîbes .
0,291 der gotes schalc lebete
0,292 eine gewoneheit her habete .
0,293 daz her alle tage suochete .
0,294 sîne venje alsô ofte .
0,295 biz ime der sweiz abe ran .
0,296 dâ mite verdienete der gotes man .
0,297 die unwæhen spîse .
0,298 die her under den rîsen
0,299 solte suochen alle tage .
0,300 biz her sie vant mit sîneme stabe .
0,301 grôze nôt her habete .
0,302 als ich iu êr sagete
0,303 von hungere in den walde
0,304 daz treip her unze in sîn alter .
0,305 daz es in niene bedrôz .
0,306 sîn pîne was vile grôz
0,307 die er kûme erlîden mohte
0,308 dô gehügete sîn mîn trehtîn
0,309 von unmehten her in lôste
0,310 dô sande her ime zuo trôste .
0,311 eine hêrlîche hinden
0,312 die brâhte ime ze allen stunten
0,313 die geistlichen spîse .
0,314 die milch alsô sîeze
0,315 die malc her des tages zuo einer zît .
0,316 dâ mite nerte her sînen lîp .
0,317 wande er wole erkante .
0,318 daz sie ime got sande
0,319 mînen trehtîn her dô lobete .
0,320 daz her sîn gehüget habete .
0,321 mit sô vaterlîchen dîngen .
0,322 des tages lief die hinde .
0,323 in den walde überal
0,324 unze die zît quam
0,325 daz iz wesen solte
0,326 sô quam sie zuo deme gotes holden .
0,327 zuo der tougenen stete .

0,328 als ir von gote wart geboten
0,329 also dicke sô sie dare quam
0,330 sô wart sie von deme guoten man .
0,331 harte wole entvengen .
0,332 her hiez sie sîne ammen .
0,333 lieplîche her sie triutete .
0,334 den hêrren sie mite behuotte .
0,335 hungers unde unmaht
0,336 daz gebôt ire die gotes kraft
0,337 ein küninc hiez Flavius .
0,338 die buoch sagent uns sus
0,339 der in deme lande hêrre was
0,340 dâ daz zeichen geschach .
0,341 daz got der rîche
0,342 gap sô wunderlîche .
0,343 die spîse deme hêrren
0,344 von eineme wilden tiere .
0,345 daz was ein michel wunder
0,346 zuo den selben stunten .
0,347 riten des küninges holden .
0,348 mit hunden in deme walde
0,349 umbe wilt sie wolten werben .
0,350 sie sâhen an einem berge .
0,351 mit anderen tieren stênte
0,352 die schoenesten hinden .
0,353 die iergen wesen mohte .
0,354 die dâ mîn trehtîn .
0,355 sîneme heiligen trûte .
0,356 dâ erwelet hæte .
0,357 daz was daz hêrlîcheste tier .
0,358 daz die jegere iemer .
0,359 in decheinen walde ie gesâhen
0,360 selbe sie des jâhen .
0,361 zuo deme kârtên dô die weideman
0,362 unde leiten allen iren vlîz dâr an
0,363 daz sie daz geschieden
0,364 von den anderen tieren
0,365 vile liebe in dâr zuo wart
0,366 dô liezen sie ûf ire vart .
0,367 die gerehten hunde .
0,368 sie vlôch an der stunte
0,369 den walt hine unde here .
0,370 dâ sie sich gerne wolte ernerren .
0,371 dô si sich mit nihte .
0,372 entsagen ne mohte .
0,373 den hunden noch den liuten .
0,374 sie tâten ir vile noete
0,375 sie was an grôzen sorgen

0,376 über tal unde gebirge .
0,377 man sie unsanfte jagete .
0,378 unze sie dô gehügete .
0,379 an den hêren vile guot .
0,380 deme sie die lîpnare truoc .
0,381 ob sie zuo ime quæme .
0,382 daz sie genesen wære .
0,383 der sin quam ire von gote .
0,384 hine zuo deme gotes boten .
0,385 sie harte vliehente quam .
0,386 in sîne cellam .
0,387 mit offenem munde
0,388 sie legete sich an der stunte .
0,389 nider bî den hêren .
0,390 sie vorhte ir vile sêre
0,391 der hêre sân wole gesach .
0,392 daz die hinde harte genoetet was .
0,393 ouch klagete sie iz an der stunte .
0,394 mit dem dinge alse si kunde .
0,395 mit lûte joch mit gebære .
0,396 daz sie in noeten wære .
0,397 die zungen sie ûz rakte .
0,398 die bein sie von ir strakte .
0,399 harte switzente si lac .
0,400 der hêre vüre die zelle trat .
0,401 dô hôrte er allenthalben .
0,402 di hörner in dem walde .
0,403 die jegere unde die hunde .
0,404 dô erkante her an der stunte .
0,405 vile wole waz ir was .
0,406 dô viel her nider an daz gras .
0,407 unde bat den êwigen vater .
0,408 daz her niene wolte staten .
0,409 daz ime zuo deme tiere
0,410 nehein leit geschæhe .
0,411 sîn gebet wart kurzlîche getân .
0,412 dô gienc her wider in sîne cellam .
0,413 dô hæte sîn amme .
0,414 eine klagelîche stimme
0,415 wider den guoten man .
0,416 der hêre bat sie wider gân .
0,417 guoten trôst her ire gap .
0,418 ein zeichen dâ geschach .
0,419 unde ein grôz wunder .
0,420 dâr ne mohte der hunde .
0,421 nâher komen neheiner .
0,422 wen sô man mit eineme steine
0,423 gewerfen mohte .

0,424 daz gebôt mîn trehtîn
0,425 sie giengen allenthalben
0,426 schiuhente in den walde .
0,427 sie ne wisten war daz tier komen was .
0,428 ouch gesweich in der tac .
0,429 dô giengen sie hine widere
0,430 entgegen jegeren .
0,431 die naht rîsen began .
0,432 dô muosten die weideman .
0,433 mit den müeden hunden
0,434 zuo den herbergen wenden
0,435 sân des næhesten tages
0,436 die jegere huoben sich aber .
0,437 mit vlîze hine ze walde .
0,438 als ich iu êr zalte .
0,439 wie iz des êrren tages ergienc .
0,440 rehte di selben dinc .
0,441 bequâmen in aber sân .
0,442 sie ne wurben niuwet mêr dâ .
0,443 des nam sie michel wunder .
0,444 sie riten an der stunte
0,445 unde sageten deme künige
0,446 die wunder alsô manige .
0,447 die in geschên wâren .
0,448 von deme schoenen tiere .
0,449 dô her iz allez vernam .
0,450 dô bat her ime gewinnen
0,451 einen bischov hêren .
0,452 unde sagete ime dise mære .
0,453 sie tâten ein gelübede
0,454 der bischov mit deme künige
0,455 daz sie an deme næhesten tage .
0,456 riten beide sament jagen
0,457 unde sie selben ervuoren
0,458 ob iz alsô wære
0,459 alse man von deme tiere sagete
0,460 des morgenes dô iz tagete
0,461 dô huoben sich gewisse .
0,462 der küninc unde der bischov
0,463 zuo den forste vile drâte
0,464 sam grôzeme liute .
0,465 die michelen menige .
0,466 –[...]
0,467 daz was dô der dritte tac
0,468 daz si neheiner ruowe ne pflac
0,469 sie ne wære ie vlühtic .
0,470 den tac biz an die naht
0,471 daz wâren ungenâde .

0,472 des wart sie vile müede
0,473 gerne si sich wolte .
0,474 entsagen in den walde
0,475 daz tete sie durch den guoten hêren .
0,476 sie in ne dorfte niuwet sêren
0,477 daz was ein michele nôt .
0,478 si solte vile nâch den tôt
0,479 von sînen schulden gewinnen
0,480 dô muoste sie wider sinnen
0,481 dâ sie die helfe wiste .
0,482 der hêre was gewisse
0,483 in sîne zelle gegangen .
0,484 unde warte sîner ammen
0,485 dô her ire sorge hâte .
0,486 dô quam sie vile drâte
0,487 geloufen zuo den guoten man
0,488 si legete sich sân
0,489 nider vûre den hêren
0,490 sie vorhte ir vile sêre .
0,491 dô die arme hinde
0,492 harte vliehente .
0,493 quam zuo deme guoten man .
0,494 her bedeckete sie sân .
0,495 mit sîner wât .
0,496 dô klagete der hêre vile guot .
0,497 daz michele sêr .
0,498 daz ir durch in was geschên
0,499 her gedâhte iz ime zuo sünden .
0,500 dô jageten die hunde
0,501 vile vaste an die stat .
0,502 dâ daz gemerke was
0,503 daz sie dô niht verrer ne muosten komen .
0,504 dô wart si in anderstunt benomen .
0,505 daz sie ne wisten war sie quam
0,506 dô hæten iz die wartman
0,507 harte wole behüetet .
0,508 dô hiezen sie die liute .
0,509 die dicke umbe behaben .
0,510 dô nam ir einer sînen bogen
0,511 der die hinden wole gesach .
0,512 wâ sie durch die dorne brach .
0,513 dâ her sie ze jungeste vernam
0,514 mit sînen guoten strâlen .
0,515 schôz her dar nâch wâne .
0,516 dô stuont ime leider ze nâhe .
0,517 jener vile guote man .
0,518 des entvienc her eine wunden vreissam .
0,519 die was leider harte grôz

0,520 daz bluot vreisliche vlôz .
0,521 von sîneme lîbe
0,522 dô wânte her âne zwîvel
0,523 daz sîn ende komen wære
0,524 dô klagete her michel sêrer
0,525 jenes armen mennischen nôt
0,526 danne her tete sîn selbes tô
0,527 daz quam von sînen gûeten
0,528 dô her lac in den noeten
0,529 her bat den êwigen vater
0,530 daz her die himelischen boten
0,531 dar zuo ime wolte senden
0,532 her verwânte sich sînes endes
0,533 des heiligen mannes cella
0,534 was bewahsen alle .
0,535 hinden unde vorne
0,536 mit krûte unde mit dornen
0,537 mit stocken unde mit stûden
0,538 dô daz liut nâher quam
0,539 die [...]
0,540 [...] verbluotet .
0,541 vore sîner zelle .
0,542 deme sâr[...]
0,543 ze stete her die suoche verbôt .
0,544 der küninc unde der bischov .
0,545 giengen dar alterseine .
0,546 sie vunt den vile reinen .
0,547 in geistlicher getæte .
0,548 mit münichlicher wæte
0,549 mit grâweme hære .
0,550 in guotlicher gebære
0,551 iz dûhte sie harte vorhtsam .
0,552 ze sehenne den altgrîsen man .
0,553 sente Aegidium hæte daz bluot
0,554 brâht in alsô grôze nôt .
0,555 daz her es unkreftic was .
0,556 also her die hêrren ersach
0,557 den küninc unde den bischov .
0,558 dô neic her in gewisse
0,559 harte gezogenliche .
0,560 her gruozte sie geistliche .
0,561 des genâdeten ime die hêrren .
0,562 dô vorhte her vile sêre .
0,563 der hinden die bî ime lac .
0,564 der hêrre eines vrides bat .
0,565 den hæte her schiere erworben .
0,566 sint was her âne sorge .
0,567 dô begunden die vile gewaltigen man .

0,568 vile innicliche vrâgan
0,569 jenen guoten hêrren .
0,570 wie lange her dâ gewære
0,571 ouch weliches lîbes her lebete .
0,572 unde waz her namen habete .
0,573 unde wannen her wære geboren .
0,574 daz wolten sie gerne ervaren .
0,575 unde umbe sîne wunden .
0,576 ob her an disen stunten
0,577 wære worden sô sêr .
0,578 ouch vrâgeten sie in umbe daz tier .
0,579 waz iz dâ mit ime tæte .
0,580 si beswuoren den vile guoten
0,581 mit eide sie iz begriffen .
0,582 ouch gebôt iz ime der bischov .
0,583 bî rehter gehôrsamicheit .
0,584 dô begunde her in sagen die wârheit
0,585 dô sie den guoten hêrren .
0,586 alsô tiure beswuoren .
0,587 durch nôt her dô sagete .
0,588 die arbeit die her habete
0,589 in deme einoete erliten .
0,590 ouch vienc her ane dâ ze stete
0,591 unde sagete in manige noete .
0,592 die her erstriten hæte
0,593 in walde unde in lande .
0,594 sint her des begunde .
0,595 daz her sich wolte villen .
0,596 durch den gotes willen .
0,597 her sagete in an den stunten .
0,598 wie iz quam umbe sîne wunden .
0,599 unde sagete in ouch mêr
0,600 wie ime got daz tier .
0,601 ze trôste hæte dar gesant
0,602 ouch nante her in daz sîn lant
0,603 unde sagete in daz sîn geslehte .
0,604 daz was edele unde mehtic
0,605 ouch nante her in den namen sîn .
0,606 daz weiz aber mîn trehtîn
0,607 her tete iz ungerne .
0,608 mohte er es über werden .
0,609 daz her in dô gesagete
0,610 daz her getân habete
0,611 wen daz her den vürsten
0,612 niuwet verziehen ne torste
0,613 daz her niht ne wolte .
0,614 neheinen heilære haben .
0,615 wen der zuo deme jungesten tage .

0,616 erteilet wîp unde man .
0,617 den wolte her ze arzâte hân
0,618 dô die hêrren vernomen habeten .
0,619 daz her niht ne gerte .
0,620 niemannes heiles .
0,621 wene gotes eines .
0,622 dô bâten sie den gotes man .
0,623 daz her ire gebe wolte entwâhen .
0,624 ob sie iht dâ hæten .
0,625 an schatze oder an wæte .
0,626 des her geruochete .
0,627 ire gebe sie vûre in brâhten .
0,628 iz ne was ime joch sô mære .
0,629 daz her dâ gekêren .
0,630 sîn ougen wolte .
0,631 danne her iz nemen solte .
0,632 daz ne tet er durch neheine smâchheit .
0,633 ime was die girede leit .
0,634 ire gebe her niene wolte .
0,635 sie bâten den gotes holden .
0,636 daz her ir mit sîneme gebete .
0,637 gedenken wolte ze gote
0,638 daz gelobete der guote man .
0,639 urloup dô nâmen .
0,640 der küninc unde der bischov .
0,641 sie wunderten sich gewisse .
0,642 sô grôzer heilicheite .
0,643 alle die liute .
0,644 die dâ mit in wâren .
0,645 die sprâchen den hêrren .
0,646 unde redeten ire sêle gewarheit .
0,647 daz was ir selbes sælicheit
0,648 dô die gewaltigen hêrren .
0,649 wider zuo den herbergen vuoren .
0,650 mit der gesameneten diete .
0,651 dô klagete manic man die tæte .
0,652 daz her ie an die vart quam .
0,653 dâ der heilige man .
0,654 sô gemüejet solte werden .
0,655 dô sie dannen kêrten .
0,656 dô was hinder in bestân .
0,657 jener schuldiger man .
0,658 der den hêrren guoten .
0,659 sô verwundet hæte .
0,660 iz was ime innicliche leit .
0,661 mit rehter gehôrsamicheit .
0,662 quam her vûre den gotes schalc .
0,663 her gap sich an sîne gewalt .

0,664 mit bitteren trehenen .
0,665 daz was ein michel jâmer .
0,666 sêre klagete her dâ ze stete .
0,667 daz her ie sô vreisliche getete .
0,668 an der grôzen meintât .
0,669 dô vergap iz ime der gotes trût .
0,670 mit inniclichen Worten .
0,671 nâch sînen geverten .
0,672 hiez her in kêren .
0,673 der gotes bote hêre .
0,674 mîneme trehtîne her des lop gap .
0,675 daz her sô sêre wunt was
0,676 wande her wole gehügete .
0,677 daz sîn ende verhabete .
0,678 an ime die swâren sühte .
0,679 unde dô her sînen trehtîn .
0,680 dâr umbe genâdene bat
0,681 schiere dô got ime antwürte gap
0,682 her gehiez ime –[...]
0,683 –[...][...]
0,684 manic wîp unde man
0,685 des ist her iu –[...] –[...]
0,686 dô si gotes bilede
0,687 von dem tiere wilde
0,688 vernâmen daz man in dem einoete vant .
0,689 dô gedâhten sie über daz lant
0,690 daz in den walde wære .
0,691 ein guoter merterære
0,692 ein wâr gotes holde .
0,693 mîn trehtîn daz dô tuon wolte .
0,694 daz her dâ würde mære .
0,695 die in manigere swære .
0,696 suocheten in durch ire nôt .
0,697 den gap her getriuwen rât .
0,698 ouch begunde her sie wîsen .
0,699 den wec zuo deme paradîse
0,700 mit sîner süezen lêre .
0,701 jener küninc hêre
0,702 der dâ Flavius hiez .
0,703 unlange her iz liez .
0,704 ê daz her dar wider quam .
0,705 unde sprach den heiligen man .
0,706 her klagete ime vile sêre .
0,707 manige sünde swære .
0,708 die her hæte getân
0,709 den vile guoten man .
0,710 her ze meistere erkôs
0,711 vile michelen trôst .

0,712 her zuo ime habete .
0,713 also lange sô her lebete .
0,714 her begunde in harte minnen .
0,715 dâ ze Kerlingen
0,716 her ein gewaltic küninc was .
0,717 vile michelen schatz .
0,718 her ime dicke brâhte
0,719 der hêrre niene ruochete
0,720 neheiner küninclîcher gebe
0,721 her wolte iemer arm wesen .
0,722 in diseme broeden lîbe .
0,723 her was des âne zwîvel .
0,724 swenne her erstürbe .
0,725 daz es ime gelônnet würde .
0,726 mit der gotes genâde .
0,727 daz ist die êwige gâbe
0,728 dô der gotes holde .
0,729 alsô in dem walde .
0,730 alle wîle gewas .
0,731 der küninc in dicke dâ sprach .
0,732 unde klagete ime sîne noete .
0,733 die überwant her mit sîneme râte .
0,734 liep was ime der gotes trût .
0,735 dicke bôt her ime sîn guot .
0,736 sînen schatz unde sîne gebe .
0,737 der hêrre ne wolte es niuwet nemen .
0,738 unze in der küninc guote .
0,739 vile lange genôtte .
0,740 unde sanctus Aegidius gesach .
0,741 daz her ime guot unde schatz .
0,742 gerne geben wolte .
0,743 dô bat der gotes holde
0,744 daz her mit deme guote .
0,745 nâch sîneme râte tete .
0,746 daz her ime sô dicke hæte erboten .
0,747 daz her iz opferte gote .
0,748 unde her durch Kristes willen .
0,749 dâ bî sîner zellen .
0,750 ein münster wirken lieze .
0,751 unde dâ samenen hieze .
0,752 die gotes holden .
0,753 die doch wesen wolten .
0,754 iemer âne zwîvel .
0,755 an münichlîcheme lîbe .
0,756 daz die dâ ze stete .
0,757 gotes dienest teten .
0,758 iemer naht unde tac .
0,759 Flâvius der küninc sprach .

0,760 her tet iz vile gerne .
0,761 ob her danne dâ wolte werden .
0,762 der gebruodere geistliche vater .
0,763 unde ouch abbet der stete .
0,764 dâ werden wolte .
0,765 dô sprach der gotes holde .
0,766 her ne mohte des niht getuon .
0,767 ouch ne wære her durch neheinen ruom .
0,768 in daz einoete gevaren .
0,769 sîne sêle wolte her des bewaren .
0,770 daz sie iemer durch decheine gîre .
0,771 ze helle gevüere
0,772 dô der tiure gotes schalc .
0,773 versprach den geistlichen gewalt
0,774 –[...] kûme klagete
0,775 ouch sprach her her ne habete
0,776 die tugent noch die güete
0,777 daz her künde behüeten
0,778 sô michelen magen
0,779 deme künige wolte her iz versagen
0,780 ie ze aller stunte
0,781 ouch sprach her her ne kunde .
0,782 die sprâche von deme lande
0,783 her wære enelende .
0,784 her widerredete iz genôte
0,785 unze in der küninc guote .
0,786 sêre weinende bat .
0,787 ze jungeste quam iz an die stat .
0,788 daz sanctus Aegidius gelobete .
0,789 daz her selbe dâ gevrumete .
0,790 die geistlichen bruoderschaft
0,791 unde daz her zuo der stat .
0,792 abbet wolte werden .
0,793 daz tete her vile ungerne .
0,794 wen daz der gotes holde .
0,795 mîneme trehtîne niene wolte .
0,796 die êre dâ erwenden .
0,797 dô gienc her dar ze stunte .
0,798 unde wîsete alse her wolte .
0,799 wie man wirken solte
0,800 mîneme trehtîne ze êren .
0,801 ein münster vile hêre
0,802 der kristenheite ein betehûs .
0,803 daz vrumete der küninc Flâvius
0,804 der küninc von den Guten .
0,805 hiez sîne liute
0,806 wirken ein münster .
0,807 alse der gotes bote hêr

0,808 êr lêrte unde bat
0,809 dô daz templum gare was .
0,810 dô wîhete man iz ze wære .
0,811 in sente Pêteres êre .
0,812 unde anderer gotes boten
0,813 der küninc an der stete .
0,814 grôz guot dâr zuo gap
0,815 ouch gewarp her an einer anderen stat .
0,816 durch sente Aegidien willen .
0,817 bî sîner zellen .
0,818 ein hêrlich betehûs .
0,819 dâ hiez der küninc Flâvius .
0,820 vile wole zieren .
0,821 in sente Privâten êre
0,822 daz ist ein marterære .
0,823 den widemen der küninc gap
0,824 mîneme trehtîne her dienestes pflac .
0,825 ouch hæte her einen rât gegeben .
0,826 der ime daz êwige leben .
0,827 gerne gewinnen wolte
0,828 swâ her decheinen gotes holden .
0,829 geeischete in deme lande
0,830 in gebirge oder in walde .
0,831 oder iergen in gotelîchen site .
0,832 der gewunnen sie sô vile .
0,833 in daz münster âne zale
0,834 daz gotes dienst dâ wole .
0,835 volliclîchen rât gewan
0,836 die münichlîchen rêgulam .
0,837 begunden sie dâ volbringen
0,838 mit alsô getânen dingen .
0,839 sô iz deme lîbe wole gezam
0,840 gote wurden sie gehôrsam .
0,841 dô daz niuwe gestifte
0,842 alsus was berihtet .
0,843 mit den gotes dienstliuten
0,844 dô bat der küninc guote .
0,845 sente Aegidium daz her dô gehügete
0,846 waz her gelobet habete .
0,847 dô sie dâ redeten eine
0,848 der gotes bote reine .
0,849 iz vile ungerne tete
0,850 iedoch muoste her dâ ze stete .
0,851 entvâhen den geistlîchen gewalt
0,852 dô wart der tiure gotes schalc .
0,853 ein abbet vile hêre
0,854 sîn name wart mære .
0,855 den grôzlîchen schatz her besaz .

0,856 sîneme lîbe wart lützel destе baz .
0,857 her en ruochte niuwet umbe daz guot .
0,858 sînen bruoderen her gebôt
0,859 daz sie geistliche lebeten .
0,860 unde die wâren minne habeten .
0,861 des wurden sie ime undertân .
0,862 dô hiez sie der heilige man .
0,863 harte vlîzicliche pflegen
0,864 ire –[...]
0,865 –[...] sô her lebet
0,866 dô der küninc guote
0,867 nâch sente Aegidien râte
0,868 dâ hæte gestiftet .
0,869 ein goteshûs vile mehtic .
0,870 liep wart ime die stat
0,871 dô daz hûs volbrâht wart
0,872 durch sente Aegidien minne
0,873 daz lant daz dâ al dâr umbe .
0,874 über vûnf mîle was gelegen
0,875 gap her ime nû wil ich iu daz sagen
0,876 von welichen dingen daz quam
0,877 der küninc was in ein ander lant
0,878 alle wîle gevaren
0,879 dô sanctus Aegidius hôrte sagen
0,880 daz her komen solte
0,881 sich huop der gotes holde
0,882 von sîner zellen
0,883 durch der liebe willen
0,884 die her zuo deme küninge hæte
0,885 der gotes bote guote
0,886 dô vûnf mîle engegen ime vuor
0,887 dâ entvienc her den küninc hêr
0,888 mit geistlichen dingen
0,889 dâ was triuwe unde minne
0,890 von den dinge iz geschach
0,891 daz her an die bruoderschaft
0,892 daz lant dô gegeben habete
0,893 als ich iu êr sagete
0,894 des her ouch vile sêre genôz
0,895 sîn lôn wart vile grôz
0,896 dô her langer leben ne solte
0,897 ime gehalf der gotes holde
0,898 der guote sente Aegidie
0,899 daz her dâ ze himele
0,900 eine stat vile hêrlich gewan
0,901 daz von jener jaget quam
0,902 dâ ime daz gelücke geschach
0,903 daz her den heiligen man sach

0,904 des hât her hiute wûnnen .
0,905 die grôzen mandunge
0,906 vore gote dâ in himele
0,907 des gehalf ime sente Aegidie
0,908 dô sanctus Aegidius hæte .
0,909 manigen mûnich guoten .
0,910 in sîn mûnster gewonnen
0,911 dô was her allez sundern
0,912 in sîner zelle .
0,913 dô gienc her stille
0,914 in daz vrône mûnster .
0,915 unde gebetete ime aldâr
0,916 daz iz sînes dankes nieman ne gesach
0,917 ouch wole her eteswenne sprach
0,918 mit sînen bruoderen .
0,919 sô her sie wolte lêren .
0,920 geistlîche ze lebenne .
0,921 die rehten werc ze habenne
0,922 daz sie vile gerne tâten .
0,923 ire vater sie bâten .
0,924 durch sîne genâde .
0,925 daz her ruochte entvâhen .
0,926 den priesterlîchen namen .
0,927 wande her in von rehte solte haben
0,928 ouch bâten es die hêren .
0,929 die in deme lande wâren
0,930 die heithaften liute .
0,931 manic leie guote .
0,932 der hêre in des antwürte gap
0,933 her sprach “wie gezæme mir daz
0,934 daz ich den namen entvienge .
0,935 unde ze gotes tische gienge
0,936 unde sînen lîchamen hêre
0,937 in mîne hende næme .
0,938 daz mac mich wole vergân
0,939 ich bin ein harte verworht man .
0,940 maniger sünden bin ich vol
0,941 swer den namen haben sal .
0,942 der bedarf wole reines muotes
0,943 unde guoter liute râtes .
0,944 die in geistlîche kunnen lêren
0,945 wie her gote sole dienen”
0,946 dô die diet gehôrte
0,947 daz der hêre mit den worten .
0,948 des namen sich weigerete
0,949 die mûnche unde die liute .
0,950 riefen in alsô dicke an
0,951 unz der heilige man .

0,952 gelobete daz her iz tæte
0,953 dô wart der hêrre guote
0,954 ze priestere gewîhet .
0,955 der werlte sich verziehet
0,956 genædiclicher dinge .
0,957 swer sô ir an gewinnet
0,958 dâ vûre was sîn leben starc .
0,959 dô her priester gewart
0,960 dô begunde her sich villen .
0,961 durch den gotes willen .
0,962 nû ruoche her uns ze wegenne
0,963 daz uns got ruoche ze vergebenne
0,964 durch sîne gûete .
0,965 unser manigen meintæte .
0,966 dô der wære gotes trût
0,967 wart ze priestere gewîhet .
0,968 unde her den gewalt hæte
0,969 daz her nôthafte liute .
0,970 mohte entbinden
0,971 swer ime sîne sünde
0,972 begunde ze klagenne .
0,973 deme half her sie ze tragenne .
0,974 mit almuosene unde mit gebete
0,975 durch sîne gûete her daz tete .
0,976 den süntigen liuten
0,977 was der hêrre guote .
0,978 vile harte enstic .
0,979 ouch vile genædic
0,980 swie senfte sô her in wære .
0,981 sô riet in doch der hêrre .
0,982 daz sie des wole gehügeten .
0,983 waz got durch sie habete .
0,984 an deme kriuze erliten .
0,985 unde wie sie daz wolten erstaten .
0,986 mit etelichen dingen
0,987 unde sie durch sîne minne .
0,988 der martere ende –[...] wolten tragen .
0,989 dô begunde her in vore sagen
0,990 waz sie tuon solten .
0,991 her sprach “swelich ir sô wolte
0,992 besitzen gotes rîche .
0,993 daz her allertagelîche .
0,994 mîneme trehtîne solte dienen .
0,995 mit vorhten joch mit êren .
0,996 unde durch sîne hulde .
0,997 sich kestigen solten
0,998 in venjen unde in vaste .
0,999 in wachenne unde in vroste .

0,1000 unde in anderen arbeiten
0,1001 wande nieman ungemietet .
0,1002 mîneme trehtîne dienet .
0,1003 es ne werde ime wole gelônnet .”
0,1004 sus getâne lêre .
0,1005 tete der tiure hêrre
0,1006 der süntigen diete
0,1007 ouch gap her in geistliche ræte .
0,1008 her bat daz si liezen vallen .
0,1009 den unrechten willen .
0,1010 von ire herzen .
0,1011 unde sie ouch verwiezen
0,1012 die verdamneten werc .
0,1013 die sint ze büezenne starc .
0,1014 ouch riet her den liuten .
0,1015 daz sie iz durch got tæten .
0,1016 unde macheten sich alsô reine .
0,1017 daz sie wole mohten gemeinen .
0,1018 in der himelischen schare .
0,1019 swenne sie solten varen .
0,1020 daz man sie ne dorfte .
0,1021 in den karkære werfen .
0,1022 dâ daz viur iemer inne .
0,1023 vreisliche brinnet .
0,1024 daz niemer erleschen ne mac .
0,1025 daz wellet naht unde tac .
0,1026 her bat daz sie sich des wereten .
0,1027 unde die sêle genereten .
0,1028 unde iemer dâr umbe rungen .
0,1029 daz sie gotes hulde gewonnen .
0,1030 sus getâne lêre .
0,1031 tete der tiure hêrre .
0,1032 den süntigen liuten .
0,1033 jô ne mac sîne güete .
0,1034 nieman vollenschrîben .
0,1035 mit vederen noch mit stilen
0,1036 die her dô habete .
0,1037 dô her in der werlte wonete .
0,1038 von diu müget ir wole wizzen welich her ist .
0,1039 daz her den heiligen Krist .
0,1040 alle tage genâden mac manen .
0,1041 swer iz in suochet ane
0,1042 mit wârer minne .
0,1043 deme hilfet her gedingen .
0,1044 âne aller slahte zwîvel .
0,1045 zuo deme êwigen lîbe
0,1046 dô –[...]
0,1047 –[...] –

0,1048 von sente Aegidien –[...]
0,1049 –[...]
0,1050 von deme gotes trûte .
0,1051 die michelen guottæte
0,1052 zuo ime sande her sînen boten .
0,1053 unde hiez in grôzlîche biten
0,1054 durch die wâren minne
0,1055 unde durch sînes schepfæres willen
0,1056 daz her zuo ime ruochte komen .
0,1057 unde ime mit râte wolte vrumen .
0,1058 wie her die sêle solte ernerren .
0,1059 ze stete vuoren sie dare
0,1060 unde wurben ire boteschaf .
0,1061 mit zûhten alse daz reht was
0,1062 wider den heiligen man .
0,1063 dô sente Aegidius vernam .
0,1064 daz her in ze hûse ladete .
0,1065 daz her der sêle gewegete .
0,1066 dô wart her des harte willic .
0,1067 wande her an den êwigen lîp .
0,1068 mit sîneme râte .
0,1069 manige sêle brâhte .
0,1070 ouch sprach der gotes holde .
0,1071 daz her gerne dienen wolte .
0,1072 sente Pêters vogete .
0,1073 die vart her dô lobete .
0,1074 dô sanctus Aegidius der guote .
0,1075 die vart gelobet hæte
0,1076 dô gienc der guote hêrre .
0,1077 zuo den münstere .
0,1078 unde sagete den gotes holden .
0,1079 war her varen wolte .
0,1080 sînen undertânen
0,1081 her bat sie daz sie wâren
0,1082 mit grôzer stæticheit
0,1083 ze gotes dieneste gereit .
0,1084 biz her dar wider quæme
0,1085 ouch gebôt her daz man ir pflæge .
0,1086 mit klôsterlîcher minnen .
0,1087 ze sînen geistlichen kinden .
0,1088 her urloup nam .
0,1089 dô huop sich der gotes man .
0,1090 mit des küniges boten .
0,1091 sîne vart bevalh her gote .
0,1092 her bat daz her in bewarte .
0,1093 daz in daz niene tarete .
0,1094 daz her under die werlt vüere .
0,1095 unde in solichen wünnen wære

0,1096 sîn vart was sô gelegen .
0,1097 daz her muoste under wegen .
0,1098 manige herberge hân .
0,1099 die lantkündigen man .
0,1100 die den hêrren vuorten .
0,1101 in eine stat sie kârten .
0,1102 unde herbergeten dare .
0,1103 dâ was ein münster ze wâre .
0,1104 in des heiligen kriuzes êre gewîhet .
0,1105 dar gâhete der gotes trût .
0,1106 daz her sîne sünde dâ erklagete .
0,1107 unde her ouch gehügete .
0,1108 der kristenheite mit sîneme gebete .
0,1109 daz her innicliche . tete
0,1110 dô der heilige man .
0,1111 in daz münster quam .
0,1112 unde her sîne venje hæte geleist .
0,1113 dô was der unreine geist .
0,1114 an eineme winkele dâ inne .
0,1115 her gewan eine vreisliche stimme .
0,1116 die wîle der hêrre an sîneme gebete lac .
0,1117 ûz einem mennischen her sprach .
0,1118 lûte rief her überal .
0,1119 iz hôrten wîp unde man .
0,1120 her sprach “eîâ sente Aegidius .
0,1121 daz ich ie quam in diz betehûs .
0,1122 wie sêre mich daz riuwet .
0,1123 ich ne solte dîn hie niht getrûwen .
0,1124 dîn gebet daz ist swære .
0,1125 daz vûrhte ich mir sêre .
0,1126 wande dû hie bevore hâst getân .
0,1127 des ich nû grôz angest hân .
0,1128 an mîneme genôze .
0,1129 den dû hêrre verwizze .
0,1130 des bin ich an grôzen sorgen .
0,1131 wie gerne ich under die erden .
0,1132 vüere ob ich mohte .
0,1133 daz ich dich niht sehen muoste
0,1134 –[...] mich –[...] [...]
0,1135 –[...] [...]
0,1136 unde ich vûrhte mir nie mêre
0,1137 von êwen wan ze êwen”
0,1138 dô der heilige man
0,1139 den unreinen geist dâ vernam
0,1140 sîn gebet her dô liez .
0,1141 unde den vîant verweiz .
0,1142 daz kriuze her vüre sich tete .
0,1143 den tiuvel schûhte her ze stete

0,1144 her hiez in varen verwâzen .
0,1145 daz her den man lieze
0,1146 daz her ime nehein schade ne wære
0,1147 dô leiste her iz schiere
0,1148 sîn vart die wart eislich .
0,1149 her gewan angest vreislich .
0,1150 wande her in hiez verdamnet .
0,1151 varen in den êwigen tôt .
0,1152 der man den her hæte
0,1153 dâ vore in grôzer noete
0,1154 der gienc dô gesunt dannen
0,1155 her genôz des heiligen mannes
0,1156 der dâ êr was mære
0,1157 der wart dô ze wære
0,1158 der iteniuwen gûeten
0,1159 gelobet vile wîtene .
0,1160 daz her den unreinen geist .
0,1161 mit sîneme gewalt dâ vertreip
0,1162 sanctus Aegidius der hêrre .
0,1163 nâch diseme gotelîchen mære .
0,1164 her hine ze hove vollenquam .
0,1165 dô entvienc in der küninc sân .
0,1166 mit – michelen êren
0,1167 Karl der vile mære .
0,1168 sân vile wole gesach .
0,1169 daz iz alsô was .
0,1170 alse man von deme gotes schalke sagete
0,1171 dâ mit ime her in habete
0,1172 die unmanigen tage
0,1173 in den begunde her ime klagen
0,1174 sêre sîne sünde .
0,1175 die tougenen wunden .
0,1176 die ime der vîant hæte getân .
0,1177 die heilete ime der gotes man .
0,1178 mit vile sûezer lêre .
0,1179 sanctus Aegidius der hêrre .
0,1180 Karlen den küninc bat .
0,1181 daz her naht unde tac .
0,1182 gote innicliche vlêhete .
0,1183 unde her ze guote tete .
0,1184 allez daz her mohte .
0,1185 des lônete ime mîn trehtîn .
0,1186 sanctus Aegidius der guote man .
0,1187 deme künige her ze heile dar quam .
0,1188 wande Karl der hæte getân .
0,1189 eine sünde die was sô vreissam .
0,1190 daz her ire verloren wære .
0,1191 ob her niene genüzze des hêrren .

0,1192 ouch was sie sô schamesam
0,1193 daz her sie nie neheinem man .
0,1194 vore schamen ne torste geklagen .
0,1195 die wolte her joch verholen haben .
0,1196 deme gotes trûte .
0,1197 dô meldete in got der guote .
0,1198 als ich iu nû wil sagen .
0,1199 iz geschach an eineme sunnentage .
0,1200 daz der küninc bat den guoten man .
0,1201 eine betemesse singen .
0,1202 unde her sîn dâr inne gedæhte .
0,1203 alse her daz opfer bræhte .
0,1204 daz tete der guote hêrre .
0,1205 vile inniclichen gerne .
0,1206 die messe begunde her singen .
0,1207 mit wârer minne .
0,1208 alse der gotes holde .
0,1209 daz opfer segenen solte .
0,1210 dô quam der engel hêre .
0,1211 ûfe daz altære .
0,1212 unde brâhte ime gotes – boteschaf .
0,1213 einen brieve her ime an die hant gap .
0,1214 unde hiez daz her in læse .
0,1215 unde des âne zwîvel wære .
0,1216 daz in ime got gesendet habete .
0,1217 swaz sô ime der brieve sagete .
0,1218 daz wære wâr alse der tôt .
0,1219 dô neic ime der gotes trût .
0,1220 der engel vuor ze himele .
0,1221 den brieve her –[...]
0,1222 ob her sîne sünde –[...]
0,1223 unde in genâden bæte
0,1224 daz her ime genâde tæte .
0,1225 zuo der sêle unde zuo deme lîbe .
0,1226 des wære nehein zwîvel .
0,1227 dô sente Aegidius der guote .
0,1228 den brieve gelesen hæte .
0,1229 unde her dâ inne gesach .
0,1230 die tougenlichen boteschaf .
0,1231 daz wir haben hie nidene .
0,1232 den grôzen trôst von himele .
0,1233 mînen trehtîn her dô lobete .
0,1234 daz her sîn gehüget habete .
0,1235 mit sôgetânen êren .
0,1236 Karlen den mæren
0,1237 her dâr zuo ime gên bat .
0,1238 den brieve her ime in die hant gap .
0,1239 unde bat in daz her læse .

0,1240 unde her selbe gesæhe
0,1241 waz her habete getân .
0,1242 alse her in in die hant genam
0,1243 unde her in lesen begunde .
0,1244 dô sach her die vreissamen sünde
0,1245 die her selbe hæte getân .
0,1246 an den brieve geschriben stân
0,1247 des wurden sîne riuwe grôze .
0,1248 deme hêrren quam her ze vuozen .
0,1249 mîneme trehtîne her sich schuldic gap
0,1250 sanctum Aegidium her dô bat .
0,1251 daz her in mit sîneme gebete
0,1252 wolte ledigen ze gote .
0,1253 von sîneme zorne .
0,1254 daz tete der hêrre gerne .
0,1255 der manigen güete her vol was .
0,1256 got her innicliche bat .
0,1257 daz her sîne hulde
0,1258 deme künige geben wolte
0,1259 ze sînen genâden her in bevalh .
0,1260 des genôz der küninc Karl wole .
0,1261 ime gehalf der guote man .
0,1262 daz her gotes hulde gewan .
0,1263 dô riet ime der hêrre .
0,1264 daz her niemer mêre .
0,1265 die sünde ne getæte .
0,1266 von der in got erlöst hæte .
0,1267 dô sanctus Aegidius der guote .
0,1268 deme künige geholfen hæte .
0,1269 grôzer genâden umbe got .
0,1270 dô nam her sân urlap .
0,1271 zuo dem künige Karle .
0,1272 her liez in ungerne .
0,1273 dannoch von ime varen .
0,1274 mohte her in dâ langer behaben .
0,1275 dô her in aber mit nihte .
0,1276 erwenden ne mohte .
0,1277 dô hiez her ime vüre tragen .
0,1278 die vile hêrlîchen gebe .
0,1279 an silbere unde an golde .
0,1280 der hêrre es niene wolte .
0,1281 dô is der küninc sîneme gaste .
0,1282 niht ne mohte bevestenen .
0,1283 dô bat her den hêrren .
0,1284 daz her es zuo sînem münstere
0,1285 doch ein teil vuorte .
0,1286 daz her iz dâ mite gezierte
0,1287 des wart her ime gehôrsam

0,1288 urlop nam der hêrre sân .
0,1289 sich huop der hêrre guoter .
0,1290 wider in sîn klôster .
0,1291 in wîseten des keiseres boten .
0,1292 sie quâmen zuo einer burcstete .
0,1293 dâ der gotes holde .
0,1294 inne herbergen solte .
0,1295 ein vürste in der burc was .
0,1296 der des gerihtes dâ pflac .
0,1297 deme was geschehen vile leide .
0,1298 sîn kint was verscheiden .
0,1299 von der werlte gevaren .
0,1300 sanctus Aegidius quam dare .
0,1301 dô her die grôze klage vernam .
0,1302 dô erbarmete iz den guoten man .
0,1303 michel jâmer her dâ sach .
0,1304 vater unde muoter lac .
0,1305 beide über der bâren .
0,1306 unde weineten alsô sêre .
0,1307 daz deme wâren gotes boten .
0,1308 in sîneme herzen wê tete
0,1309 dô der vile guote man .
0,1310 die wâren riuwe dâ vernam
0,1311 unde die bitteren klage .
0,1312 dô man zuo deme grabe
0,1313 daz ne mohte âne trehene
0,1314 niht ergân ze wâre
0,1315 gote trûwete her verre
0,1316 ouch half der hêrre
0,1317 same getuot her noch dem liute .
0,1318 daz macheten sîne güete .
0,1319 dâ was ze antwürte michel liut .
0,1320 der wâre gotes trût .
0,1321 hiez den tôten ûf stân .
0,1322 vile wole gesunt gân .
0,1323 mit guoten genâden
0,1324 dâ erschein die gotes gâbe .
0,1325 die dâr êr klageten sêre
0,1326 die wurden dô ze wâre .
0,1327 der gotelichen werke vrô
0,1328 grôz lop gâben sie ime dô .
0,1329 deme guoten manne .
0,1330 ze stete sinnete her dannen .
0,1331 den ruom vorhte her sêre .
0,1332 dô ne wolte der guote hêrre
0,1333 niergen getwellen
0,1334 êr her quam zuo sîner zellen .
0,1335 dô der vile guote man .

0,1336 wider zuo sînen münstere quam .
0,1337 dô wart her ze wâre .
0,1338 von sînen bruoderen
0,1339 harte wole entvangen .
0,1340 mit klôsterlîchen minnen .
0,1341 sîner künfte wâren sie vrô
0,1342 mînen trehtîn lobeten sie dô .
0,1343 sich zôch sân der guote .
0,1344 in daz geistlîche einoeete .
0,1345 in sîne tougenen zellen .
0,1346 dâ her durch gotes willen .
0,1347 grôz arbeit inne leit .
0,1348 in manicvalter vesticheit
0,1349 iz ne was dâr nâch ne borelanc .
0,1350 êr sich der hêrre versan
0,1351 wes her willen habete .
0,1352 dô her von den Kriechen hügete .
0,1353 daz her ze Rôme wolte varen .
0,1354 daz hæte her dannoch verboren .
0,1355 daz her dar niene quam .
0,1356 dô vorhte der heilige man .
0,1357 daz iz ime ungewerlich wære .
0,1358 sîner gebuodere .
0,1359 her unmanigen mit ime nam .
0,1360 dô huop sich der guote man .
0,1361 den wec hine ze Rôme .
0,1362 sîn vart die was schoene .
0,1363 gotelich unde vorhtsam .
0,1364 dô vollenquam der gotes man .
0,1365 ze sente Pêteres grabe
0,1366 sêre begunde her dâ klagen .
0,1367 sîne sünde mit wârer riuwe .
0,1368 gote was her getriuwe .
0,1369 den zwein heiligen boten .
0,1370 her dô sîne bihte tete .
0,1371 sente Petrô unde sente Paulô .
0,1372 dô gienc her allenthalben .
0,1373 zuo den altæren .
0,1374 unde rüegete sich sêre .
0,1375 sîner missetæte .
0,1376 michel was sîn güete .
0,1377 der sælige Aegidius .
0,1378 ergienc manic betehûs
0,1379 ze Rôme unde ze Laterân .
0,1380 vore den bâbes her dô quam .
0,1381 unde suochte sîn antlâz .
0,1382 sîn gehôrsam was vile grôz .
0,1383 der bâbes wart sân innen .

0,1384 daz die ware minne .
0,1385 mit ime gebûwet habete .
0,1386 ze hûse her in dô ladete .
0,1387 unde in dâr nâch bat .
0,1388 daz her etelîchen tac .
0,1389 mit ime ruowen wolte .
0,1390 daz tete der gotes holde .
0,1391 dô sente Aegidius der hêrre .
0,1392 die gewarheit sîner sêle .
0,1393 mit dem bâbese geredete .
0,1394 willen her dô habete .
0,1395 daz her sîner samenunge .
0,1396 ein stætlic gedinge .
0,1397 dâ ze Rôme tæte .
0,1398 mit gebruodere râte .
0,1399 her sîne abbeteie gap .
0,1400 an sente Pêteres grap .
0,1401 daz sie iemer mêre .
0,1402 dar gehôrsam wære .
0,1403 daz tete der hêrre umbe daz
0,1404 –[...] [...] .
0,1405 man ne wiste in an den dingen .
0,1406 daz her die geistlîchen man .
0,1407 kunde behalten .
0,1408 mit pfrüende gevüeren
0,1409 mit dieneste geêren .
0,1410 unde her des goteshûses liuten .
0,1411 neheine ungenâde ne tæte .
0,1412 unde her ouch daz guot bewarete
0,1413 der gemeine niene getarete .
0,1414 alsô her es zuo den jungesten tage
0,1415 vore gote rede solte ergeben .
0,1416 daz her es dâ lôn gewünne
0,1417 der bâbes an der stunte .
0,1418 gelobete daz her iz tæte
0,1419 deme gotes trûte .
0,1420 gap her des hantveste .
0,1421 swer daz gedinge bræche .
0,1422 daz her vervluochet wære .
0,1423 der gotes gnâden ie mêre
0,1424 dô der vile guote man .
0,1425 daz gedinge hæte getân .
0,1426 wider den bâbes von Rôme .
0,1427 zwô türe harte schoene .
0,1428 sente Aegidius dâ gesach .
0,1429 den bâbes her dâr umbe sprach
0,1430 dâ stuonten vogle ane gesniten .
0,1431 die bilede jener zwelif boten

0,1432 mit vlîze wâren sie ergraben
0,1433 den bâbes bat her sie ime geben .
0,1434 ze minnen unde ze ziere
0,1435 sînen münstere .
0,1436 unde ze urkünde .
0,1437 deme selben gedinge .
0,1438 daz her dô hæte getân .
0,1439 der bâbes gap sie ime sân
0,1440 her was vrô daz her sie wolte .
0,1441 sente Aegidius der gotes holde .
0,1442 gebôt sînen undertânen .
0,1443 die dâ mit ime wâren .
0,1444 daz sie si ûf huoben .
0,1445 unde in die Tibere truogen .
0,1446 unde wurfen sie in daz wazzer .
0,1447 unde ne ruochten war sie vluzzen .
0,1448 unde liezen es got pflegen .
0,1449 wâ sie quæmen ze stade .
0,1450 daz tâten sie an der stunte .
0,1451 des nam sie michel wunder .
0,1452 beide wîp unde man .
0,1453 die dâ umbe in stuonten .
0,1454 sie sprâchen alle her wuotte
0,1455 sente Aegidius der guote .
0,1456 sân urloup nam .
0,1457 dô huop sich der guote man .
0,1458 wider zuo sînen geistlichen kinden .
0,1459 der bâbes liez in mit minnen
0,1460 dô der vile guote man .
0,1461 ze Rôme urloup genam .
0,1462 dô îlete her vile harte .
0,1463 mit sînen geverten .
0,1464 wider zuo sîner zellen .
0,1465 her vergap durch gotes willen .
0,1466 grôz almuosen under wegen .
0,1467 dicke muoste her getagen .
0,1468 durch sîne unkraft .
0,1469 dô quam her an eine stat .
0,1470 dâ der gotes holde .
0,1471 die ruowe kiesen solte .
0,1472 dâ vant her einen lamen man .
0,1473 zesamene gewahsen .
0,1474 deme wâren die bein krump .
0,1475 unde sîne arme ungesund .
0,1476 neheines lides her ne gewielt .
0,1477 den âtem her kûme behielt .
0,1478 in sîneme lîbe .
0,1479 mit grôzlîchen pînen .

0,1480 her was ein marterære .
0,1481 alse in der heilige hêrre .
0,1482 sente Aegidius gesach .
0,1483 daz her in solichen noeten was .
0,1484 iz begunde in erbarmen .
0,1485 dô hiez her den armen .
0,1486 ûf stân dâ ze stete .
0,1487 der êr nie neheinen trit ne getete .
0,1488 gesunt hiez her in dannen gân .
0,1489 dô ne mohte sich der tiure man .
0,1490 sîner güete niht verbergen
0,1491 sîner herbergen .
0,1492 her dô âswîch tete
0,1493 dannen huop her sich ze stete .
0,1494 êr danne iz die liute bevunt
0,1495 dô sente Aegidius der gotes bote .
0,1496 sîne Rômvart getete
0,1497 unde her wider zuo den münstere quam
0,1498 dô sagete man sân .
0,1499 daz guote niuwe mære
0,1500 daz der habe wæren .
0,1501 zuo gevlozzen in den mere .
0,1502 zwô hülzîne türe .
0,1503 ergraben harte schône .
0,1504 daz wâren die her ze Rôme
0,1505 in daz wazzer hiez tragen .
0,1506 mînen trehtîn bat her ir pflegen .
0,1507 her hæte sie ime wole behuot .
0,1508 sint her sie an daz mere truoc .
0,1509 dâ ne mohten iz die winde erwerben .
0,1510 noch die ünde in den mere .
0,1511 sie ne vluzzen tac unde naht .
0,1512 als iz gebôt die gotes kraft
0,1513 die manic wunder hât gestalt .
0,1514 unze an sente Aegidien lant
0,1515 dâ quâmen sie ze stade .
0,1516 dô man iz deme hêrren begunde sagen .
0,1517 es wart sîn herze vile vrô
0,1518 sînen trehtîn lobete her dô .
0,1519 her sprach “hêrre mîn liebe
0,1520 wie sal ich daz verdienen .
0,1521 daz dû mir her ze lande
0,1522 die türe hâs gesendet .
0,1523 alsô manige raste .
0,1524 wole ich daz wiste .
0,1525 dô ich sie dir ze Rôme bevalch
0,1526 unde dô vile manic Walhe .
0,1527 sprach daz ich wuotte

0,1528 swer ze dînen gûeten .
0,1529 vaste gedinget .
0,1530 wie selten den betwingent
0,1531 des tiuveles liste .
0,1532 jô was hie enzwischen
0,1533 manic ungeverte
0,1534 berge unde werde .
0,1535 biz here ûf den mere .
0,1536 daz ne mohte iz allez niht erwerben
0,1537 dû ne woltes sie mir hêrre heilant .
0,1538 mit gewalt haben gesant
0,1539 des salt dû trehtîn êre .
0,1540 haben iemer mêre .
0,1541 daz dû mich sus hâs geêret .”
0,1542 zuo sînen münstere .
0,1543 hiez her die türe vüeren .
0,1544 dâ hienc man sie ze wâre .
0,1545 den liuten her dô sagete .
0,1546 daz gedinge daz her habete .
0,1547 dâ ze Rôme getân
0,1548 daz kündete her in sîn .
0,1549 daz her die türe hæte gewonnen
0,1550 zuo einer vestenunge .
0,1551 deme selben gedinge .
0,1552 swer daz iemer .
0,1553 mit gewalte erbræche .
0,1554 daz iz got an ime ræche
0,1555 dô sente Aegidius der guote .
0,1556 sich gearbeitet hæte
0,1557 dicke starke durch Krist .
0,1558 als uns vore gesaget ist
0,1559 unde sînes gothûses sache .
0,1560 sô hæte geschaffet .
0,1561 daz iz ane nihte ne missequam
0,1562 unde die gotes dienstman .
0,1563 die menige vile guote .
0,1564 nâch sînen râte .
0,1565 begunden ze lebenne
0,1566 dô stuont iz vile ebene .
0,1567 in sîneme gewalte .
0,1568 den hêrren hæte daz alter
0,1569 gemachet unkreftic .
0,1570 sînes lîbes unmehtic
0,1571 ouch wolte got sîneme dienstman
0,1572 sîner arbeite lôn .
0,1573 sîneme tiuren knehte
0,1574 der dicke wole gerehte .
0,1575 truoc die geistlichen wâfen

0,1576 dô ne wolte got in niht langer lâzen .
0,1577 in diseme enelende streben
0,1578 dâ ze himele wolte her in haben .
0,1579 zuo eineme tiuren geben
0,1580 den engel hiez her ime sagen .
0,1581 daz is zît wære .
0,1582 daz her ze hove vüere .
0,1583 her ne mohte langer niht dienen
0,1584 man solte ime lônên
0,1585 sôgetâner êren
0,1586 der niemer mêre
0,1587 ende ne würde .
0,1588 –
0,1589 unde daz her an der stunte
0,1590 ime den tac sagete .
0,1591 also got geboten habete
0,1592 daz sîn hinevart solte wesen .
0,1593 in daz êwige leben
0,1594 her den gotes schalc ladete
0,1595 daz her wole verdienet habete
0,1596 dô deme heiligen man
0,1597 die boteschaf quam
0,1598 daz ime sîn ende
0,1599 was sicher an der stunte
0,1600 sînen bruoderen her iz sagete
0,1601 daz her sich missehabete
0,1602 sie wurden es unvrô
0,1603 der hêrre trôste sie dô .
0,1604 ouch bat sie der guote .
0,1605 daz sie sô wole tæten
0,1606 unde sîner sêle gedæhten .
0,1607 engegen mînen trehtîne
0,1608 hie müget ir wole erkennen
0,1609 an ime die wâren minne
0,1610 unde sîne grôzen diemuot .
0,1611 daz her sich des niht ne überhuop
0,1612 swie her aller êren genuoc .
0,1613 dâ ze himele wiste wesen
0,1614 daz her doch niene wolte entberen .
0,1615 daz her sîne bruodere bæte
0,1616 daz sie die genâde tæten .
0,1617 mit ire gebete engegen gote
0,1618 durch daz geistliche gebot
0,1619 daz der vile guote .
0,1620 die nideren niene versmæhete
0,1621 her ne gerte ire gewegennes
0,1622 des gotes segenes .
0,1623 hæte her sich gewarnet .

0,1624 niene vorhte her den tô
0,1625 dô vile nâhe was sîn tac .
0,1626 neheines werkes her ne pflac
0,1627 wen daz her sîne sünde klagete .
0,1628 unde sînen bruoderen gesagete .
0,1629 unde her sich gote schuldic gap .
0,1630 die selbe site der her pflac .
0,1631 dâr ane wart her vunden .
0,1632 an sînen jungesten stunten
0,1633 ez geschach an einer sunnennaht
0,1634 daz dô die gotes boteschaf .
0,1635 quam dem hêren .
0,1636 unde gebôt daz her vüere .
0,1637 in daz êwige rîche
0,1638 dô huop her innicliche
0,1639 sîn ougen ûf ze Kriste .
0,1640 unde bat einer wênigen vriste
0,1641 unze her sîn gebet getæte .
0,1642 her sprach “trehtîn guote .
0,1643 ich mane dich der genâden .
0,1644 die dû mich broeden man .
0,1645 vile dicke hâs getân .
0,1646 nû erhoere mich süntigen man .
0,1647 durch dîne güete .
0,1648 unde genâde dîner hantgetæte .
0,1649 unde aller kristenheite gemeine .
0,1650 sie sîn lebentinc oder verscheiden
0,1651 unde beschirme mîn armen bruoderschaf .
0,1652 mit dîner gotelichen maht
0,1653 unde verlîch mir die êre .
0,1654 ob dû trehtîn hêre .
0,1655 iemer des geruoches .
0,1656 daz mich müeze suochen .
0,1657 dechein man zuo mîneme grabe .
0,1658 daz ich den gewalt habe .
0,1659 swer mir sîne nôt innicliche klage
0,1660 daz ich ime trôst müeze geben .
0,1661 zuo deme lîbe unde zuo der sêle .
0,1662 des gewere mich trehtîn hêre .
0,1663 swer ouch an anderen steten .
0,1664 gere mînes gebetes .
0,1665 hêre mîn wider dich
0,1666 der genâden gewere mich .
0,1667 daz ich ime vrume müge sîn .
0,1668 des gewere mich hêre trehtîn
0,1669 ich bite dich durch dîne güete .
0,1670 swer mit decheinem noeten .
0,1671 iergen werde bevangen .

0,1672 in wâge oder in lande
0,1673 also her mîner helfe gere .
0,1674 daz ich in des müeze geweren .
0,1675 mit dîneme trôste .
0,1676 nû gedenke daz dû unsich erlôstes .
0,1677 von deme hellebodeme”
0,1678 dô erhôrte got obene .
0,1679 sînen tiuren schalc .
0,1680 sente Aegidien wart der gewalt .
0,1681 von gote eroffenet .
0,1682 sîne bete hæte getân .
0,1683 vüre die kristenheit gemeine .
0,1684 dô bevalch her sich eine .
0,1685 an mînes trehtînes gewalt .
0,1686 dô sprach der tiure gotes schalc .
0,1687 “ich gere des hêrre mîn an dich .
0,1688 deme tiuvele widersage dû mich
0,1689 were sîneme willen an mir .
0,1690 unde ich bekenne hêrre dir .
0,1691 aller der sünden .
0,1692 die ich von den stunten
0,1693 al dâ here hân getân .
0,1694 sint ich in dise werlt quam
0,1695 der jihe ich mich schuldic .
0,1696 unde biten dich dîner hulden .
0,1697 hêrre himelischer got .
0,1698 wande ich dîne gebot .
0,1699 niene hân behalten .
0,1700 sô ich von rehte solte
0,1701 ich bin ein schuldiger man .
0,1702 wider dînen hulden hân ich getân .
0,1703 in manicvalten tæten .
0,1704 daz vergip mir trehtîn guoter .
0,1705 durch dîner muoter êre
0,1706 unde genâde mîner sêlen .
0,1707 in dîneme rîche .”
0,1708 dô her sô innicliche .
0,1709 vollesprach sîn gebet
0,1710 dô her lac an der stete .
0,1711 her bevalh sînen reinen âtem .
0,1712 zuo mînes trehtînes genâden
0,1713 an sînen gotelîchen gewalt .
0,1714 dô verschiet der gotes schalc .
0,1715 dô wart sîn sêle .
0,1716 von engelen den hêren
0,1717 vile wole entvungen .
0,1718 mit hêrlîcheme gesange
0,1719 die vuorten in ze wâre

0,1720 in die êwigen genâde
0,1721 in die himelischen wünne .
0,1722 dâ entvienc in die gotes samenunge .
0,1723 daz himelische her wart sîn vrô .
0,1724 getrüebet wart es aber dô .
0,1725 die irdische diet .
0,1726 daz sie den hêrren vile guot .
0,1727 langer niene muosten haben .
0,1728 des hæten sie jâmer unde klage .
0,1729 des nahtes dô der guote man .
0,1730 sîn ende genam .
0,1731 dô hôrten die müniche der engele sanc .
0,1732 den himelischen antvanc .
0,1733 sumelîche dâ wâren .
0,1734 die den himel offen sâhen .
0,1735 dâ man ire hirte .
0,1736 zuo den êwigen genâden vuorte .
0,1737 sie îleten al über den gotes man .
0,1738 dô vunten sie in verscheiden .
0,1739 daz klageten sie ze wâre .
0,1740 mit wuofte vile sêre .
0,1741 unde mit vile heizen trænen .
0,1742 wen daz sie zuo sînen gûeten .
0,1743 vile grôz gedinge habeten .
0,1744 zuo der erden sie in dô bestateten .
0,1745 mit gotelîchen êren .
0,1746 dô geschach ze wâre .
0,1747 manic zeichen über sîneme grabe .
0,1748 sint wart her erhaben .
0,1749 als iz got selbe gebôt .
0,1750 nû helfe uns der gotes trût .
0,1751 mit sîneme heiligen gedinge .
0,1752 daz wir daz êwige rîche gewinnen .